

四庫全書

子部

欽定四庫全書

藝文類聚卷十一

唐歐陽詢撰

帝王部一

總載帝王

天皇氏

地皇氏

人皇氏

有巢氏

燧人氏

太昊庖犧氏

少昊庖犧氏

帝女媧氏

炎帝

神農氏

黃帝軒轅氏

帝嚳高辛氏

少昊金天氏

顓頊

高陽氏

帝嚳高辛氏

總載帝王

尚書刑德攷曰帝者天號也王者人稱也天有五帝以立名人有三王以正度天子爵稱也皇者煌煌也

春秋演孔圖曰正氣為帝間氣為臣秀氣為人

禮斗威儀曰帝者得其根核王者得其英華霸者得其附枝故帝道不行不能王王道不行不能霸霸道不行不能守其身

管子曰明一者皇察道者帝通德者王謀得兵勝者霸呂氏春秋曰始生之者天也養成之者人也能養天之所生而為天子

春秋考耀文曰王者徃也神所輸向人所樂歸

春秋繁露曰德侔天地者稱皇帝天祐而子之號稱天  
子

董子曰古之人造文字者三畫而連其中謂之王三畫  
者天地與人也連中者通其道也取天地與人之才而  
參之非王者其孰能當是故王者必法天以大仁覆育  
萬物既化而生之又養而成之

韓詩外傳曰君者何曰羣也敢羣天下萬物而除其害  
者謂之君

白虎通曰帝王者號也號者功之表也所以表功明德  
號令臣下者也德合天地者稱帝仁義合者稱王別優  
劣也又曰接上稱天子者明以爵事天也接下稱帝王  
者明位號天下至尊之稱

漢雜事曰古者天子稱皇其次稱王秦承百王之末為  
漢驅除自以德兼三皇五帝故并為號

帝王世紀曰孔子稱天子之德感天地洞八方是以化  
合神者稱皇德合天地者稱帝仁義合者稱王

蔡邕獨斷曰上者尊位所在也太史令司馬遷記事當  
言帝則依違之但言上不敢泄瀆者尊號言尊尊之義  
也乘輿出於律文曰敢盜乘輿服御物謂天子所服食  
者也天子至尊不敢泄瀆言之故託於乘輿也天子以  
天下為家不以京師宮室為常處當乘輿行天下故謂  
之車駕天子自謂行在所今雖在京師言在行所也巡  
狩天下所奏事處皆為宮在長安則曰長安宮在泰山  
則曰泰山宮唯當時所在

禮記曰天子者與天地參德配天地兼利萬物與日月並明明照四海而不遺微小其在朝廷則道仁聖禮義之序燕處則聽雅頌之音行步則有環珮之聲升車則有鸞和之音居處有禮進退有度百官得其宜萬事得其序

六韜曰王者之道如龍之首高居遠望深視而審聽神其形而散其精若天高而不可極若川深而不可測故可怒而不怒臣乃為虎可殺而不殺大賊乃發兵勢不

行敵國乃強

管子曰黃帝立明堂之議上觀於賢也堯有衡室之間下聽於民也舜有告善之旌而主不蔽也禹立諫鼓於朝而備訊也湯有總街之廷觀民非也武王有靈臺之宮賢者進也此古聖帝明王所以有而勿失得而勿止也

尸子曰孔子曰商汝知君之為君乎子夏曰魚失水則死水失魚猶為水也孔子曰商知之矣

莊子曰赫胥氏之時民居不知所為行不知所之含哺而熙鼓腹而遊又曰昔容成氏大庭氏栢皇氏軒轅氏尊盧氏伏羲氏當是時也結繩而用之甘其食美其服樂其俗安其居鄰國相望雞狗之音相聞民至老死不相往來若此時則至治也

孫卿子曰人主者守至約而詳事至狹而切垂衣裳不下簾席之上而海內之民莫不願得以為帝王

呂氏春秋曰五帝先道而後德故德莫盛焉三王先德

而後事故事莫功焉五霸先事而後兵故兵莫强焉  
韓子曰明王制其臣下者二柄而已矣二者刑德也殺  
戮之謂刑慶賞之謂德

淮南子曰帝者體太一王者法陰陽霸者則四時君者  
用六律體太一者牢籠天地彈壓山川含吐陰陽申洩  
四時紀綱八極經緯六合覆露照導普汜而無私翾飛  
蠕動莫不仰德而生法陰陽者承天地之和形萬類之體  
含氣化物以成形類則四時者春生夏長秋收冬藏取

與有節出入有時開闔張歛不失其序喜怒剛柔不雜其理用六律者生之與殺也賞之與罰也予之與奪也非此無道又曰人主者以天下之目視以天下之耳聽以天下之智慮以天下之力動是故號令能下究而臣情得上聞百官修道羣臣輻湊喜不以賞賜怒不以罪誅

潛夫論曰太古之時兆黎初載未有上下而自順序天未事焉君未設焉未後矯處或相凌虐為萌巨害於是

天命聖人使司牧之勿令失性四海蒙利草木被德恭  
儉奉戴謂之天子

歲晉潘尼乘輿歲曰皇極肇建兩儀既分彝倫未序萬  
邦紀紛國事明主家奉嚴君各有攸尊德用不勤煌煌  
四海謁謁萬乘匪賢焉倚匪哲焉憑左輔右弼前疑後  
承一日萬機業業競競夫出其言善則千里是應而莫  
余違亦喪邦有徵辛作璇室而夏興瑤臺糟丘酒池象  
箸玉杯叔世道衰末俗化淺耽樂逸遊荒淫沈湎不式

古訓而好是佞辯不遵正路而覆車是踐滅敗之效載在前典匪唯凌夷厥世用殄故曰樹君如之何將民是司牧視之猶傷知其寒燠故能撫之斯柔而敷之斯睦無遠不懷靡思不服夫豈厭縱一人而玩其耳目內迷聲色外荒馳逐不修政事而終於顛覆

論漢賈誼過秦論曰秦孝公據崤函之固擁雍州之地君臣固守以窺周室有席卷天下包舉宇內囊括四海之意并吞八荒之心當是時也商君佐之内立法度務

耕織修守戰之具外連衡而鬪諸侯諸侯恐懼會盟而謀弱秦不愛珍器重寶肥饒之地以致天下之士合從締交相與為一當此之時齊有孟嘗趙有平原楚有春申魏有信陵此四君者皆明智而忠信寬厚而愛人尊賢重士約從離橫兼韓魏燕楚宋衛中山之衆嘗以什倍之地百萬之師叩闕而攻秦秦人開闢延敵九國之師遁逃而不敢進秦無亡矢遺鏹之費天下諸侯已困矣及至秦始皇奮六世之餘烈振長策而御宇內吞二

周而亡諸侯履至尊而制六合執敲朴以鞭笞天下威振四海南取百越之地以為桂林象郡百越之君俛首係頸委命下吏乃使蒙恬北築長城而守藩籬却匈奴七百餘里胡人不敢南下而牧馬士不敢彎弓而報怨然後踐華為城因河為池據億丈之城臨不測之谿以為固良將勁弩守要害之處信臣精卒陳利兵而誰何天下已定始皇自以為關中之固金城千里子孫帝王萬世之業也始皇既沒餘威振于殊俗然而陳涉甕牖

繩樞之子毗隸之人而遷徙之徒也材能不及中人率  
罷散之卒將數百之衆轉而攻泰山東豪俊蜂起而亡  
秦族矣且夫天下非小弱也雍州之地靖凶之固自若  
也陳涉之位非尊於齊楚燕趙韓魏宋衛中山之君也鋤  
耰棘矜非鍛於鈎戟長鎛也謫戍之衆非抗於九國之  
師也深謀遠慮行軍用兵之道非及曩時之士也然而  
成敗異變功業相反試使山東之國與陳涉度長絜大  
比權量力則不可同年而語矣然秦以區區之地致萬

乘之權招八州而朝同列百有餘年矣然後以六合為家靖凶為宮一夫作難而七廟隳身死人手為天下之笑者何也仁義不施而攻守之勢異也

魏王粲難鍾荀太平論曰聖莫盛於堯而洪水方割丹朱淫虐四族凶佞矣帝舜因之而三苗畔戾矣禹又因而防風為戮矣此三聖古之所大稱也繼踵相承且二百年而刑罰未嘗一世而乏也然則此三聖能平三聖能平則何世能致之乎孔子稱曰唯上智與下愚不移

不移者丹朱四凶三苗之謂也當紂之世殷罔不小大  
好草竊姦宄周公遷殷頑民于洛邑其下愚之人必有  
之矣周公之於三聖不能踰也三聖有所不化矣有所  
不移矣周公之不能化殷之頑民可知也苟不可移  
必或犯罪罪而弗刑是失所也犯而刑之刑不可錯矣  
孟軻有言盡信書不如無書有大而言之者刑錯之屬  
也豈億兆之民歷數十年而無一人犯罪一物失所哉  
謂之無者盡信書之謂也

魏曹冏六代論曰昔者夏殷周歷世數十而秦二世而亡何則三代之君與天下共其民故天下同其憂秦王獨制其民故傾危而莫救先王知獨治之不能久也故與人共治之知獨守之不能固也故與人共守之兼親疎而兩用參同異而並進是以輕重足以相鎮親疎足以相衛兼并路塞逆節不生及其衰也桓文率禮包茅不貢齊師伐楚宋不城周晉戮其宰王綱弛而復張諸侯傲而復肅二霸之後浸以陵遲吳楚憑江負固方城

雖心希九鼎而畏迫宗姬姦情散於胸懷逆謀消於脣吻斯豈非信重親戚任用賢能枝葉碩茂本根賴之至於王叔降為庶人猶枝幹相持得居虛位海內無主四十餘年秦據勢勝之地騁譎詐之術征伐闢東蠶食九國至於始皇乃定天位曠日若彼用力若此非深根固蒂不拔之道乎漢祖奮三尺之劔騁烏合之衆五年之中而成帝業自開闢已來其興功立勲未有若漢之易者也夫伐深根者難為功摧枯朽者易為力理勢然也

漢鑒秦之失封植子弟及諸呂擅權圖危劉氏而天下所以不傾動百姓所以不易心者徒以東牟朱虛受命於內齊代吳楚作衛於外向使高祖踵亡秦之法忽先王之制則天下已傳非劉氏有也大魏之興觀五代之存亡而不用其長策覩前車之傾覆而不改其轍跡子弟王空虛之地君有不使之民宗室竄於閭閻不聞邦國之政權均匹夫勢齊凡庶內無深根不拔之固外無磐石宗盟之助非所以安社稷為萬世之業也

晉陸機辨亡論曰昔漢氏失御姦臣竊命禍基京畿  
徧宇內皇綱弛紊王室遂卑於是羣雄蜂駭義兵四合  
吳武烈皇帝慷慨下國電發荆南權略紛紜忠勇伯世  
威稜則夷羿震盪兵交則醜虜授馘遂掃清宗祊蒸禋  
皇祖于時雲興之將帶州颶起之師跨邑雖兵以義合  
同盟戮力然皆包藏禍心阻兵怙亂或師無謀律喪威  
稔冠忠規武節未有如此其著者也武烈既沒長沙桓  
王逸才命世弱冠秀發招攬遺老與之述業神兵東驅

奮寡犯衆攻無堅城之將戰無交鋒之虜誅叛柔服而  
江外底定飭法修師則威德翕赫將北伐諸華誅鉏干  
紀旋皇輿於夷庚反帝座乎紫闈挾天子以令諸侯清  
天步而歸舊物戎車既次羣凶側目大業未就中世而  
殞用集我太皇帝以奇蹤襲於逸軌睿心因乎今圖從  
政咨於故實播憲稽乎遺風而加之以篤固申之以節  
儉疇咨俊茂好謀善斷束帛旅於丘園旌命文乎塗巷  
故豪彥尋聲而嚮臻志士希光而景驚異人輻輳猛士

如林謀無遺諱舉不失策故遂割據山川跨制荆吳而與天下爭衡矣故魏人請好漢氏乞盟遂躋天號鼎時而立於是講八代之禮蒐三皇之樂告類上帝拱揖羣后虎臣毅卒循江而守長棘勁鏃望飈而奮庶尹盡規於上四民展業於下化協殊裔風衍遐圻乃俾一介行人撫巡外域巨象逸駿擾於外閑明珠瑋寶耀於內府珍瑰重跡而至奇玩應響而赴輶軒騁於南荒衝輶息於朔野齊民免干戈之患戎馬無晨服之虞而帝業固

矣爰及末葉羣公既喪然後黔首有瓦解之志皇家有  
土崩之釁厯命應化而微王師躡運而發卒散於陣民  
奔於邑城池無藩籬之固山川無溝阜之勢軍未浹辰  
而社稷夷矣雖忠臣發憤烈士死節將奚救哉夫曹劉  
之將非一世所選向時之師無曩日之衆戰守之道  
抑有前符險阻之利俄然未改而成敗貿理古今詭趣  
何哉彼此之化殊授任之才異也又辨亡論下曰昔三  
方之王也魏人據中夏漢氏有岷益吳制荆揚而掩交廣

曹氏雖功濟諸華唐亦深矣其民怨矣劉公因險飾智功已薄矣其俗陋矣吳桓王基之以武太祖成之以德聰明睿達懿度深遠矣其求賢如弗及恤民如稚子接士盡盛德之容親仁罄丹府之愛拔呂蒙於戎行擢潘濬於係虜推誠信士不恤人之我欺量能授器不患權之我逼地方幾萬里帶甲將百萬其野沃其民練其器利其財豐東負滄海西阻險塞長江制其區宇峻山帶其封域國家之利未有巨弘於茲者矣借使中才守之以

道善人御之有術敦率遺典勤民謹政循定策守常險  
則可以長世永年未有危亡之患易曰湯武革命順乎  
天太玄曰亂不極則治不形言帝王之因天時也古人有  
言曰天時不如地利易曰王侯設險以守其國言為國  
之情險也又曰地利不如人和在德不在險言守險之  
由人也吳之興也參而由焉孫卿所謂合其參者也及  
其亡也恃險而已又孫卿所謂捨其參者也夫四州之  
萌非無衆也大江之南非乏俊也山川之險易守也勁

利之器易用也先攻之策易循也功不興而禍遘何哉  
所以用之者失也故先王達經國之長規審存亡之至  
數謙己以安百姓敦惠以致人和寬冲以誘俊乂之謀  
慈和以結士民之愛是以其安也則黎元與之同慶及  
其危也則兆庶與之共患安與衆同慶則危不可得也  
危與下共患則其難不足恤也夫然故能保其社稷而  
固其土宇麥秀無悲殷之思黍離無愍周之感矣

晉平寶晉紀總論曰昔高祖宣皇帝以雄才碩量應運

而仕至於百姓與能大象始構矣世宗承基太祖繼業  
始當非常之禮終受備物之錫至于世祖遂享皇極正  
位居體聿修祖宗之志思輯戰國之苦腹心不同公卿  
異議而獨納羊祜之策至于咸寧之末遂排羣議而仗  
王杜之決汎舟三峽介馬桂陽役不二時江湘來同掩  
唐虞之舊域班正朔於八荒太康之中天下書同文車  
同軌牛馬被野餘糧棲畝行旅草舍外閭不閉雖太平  
未洽亦百代一時矣二十餘年而河洛為墟戎羯稱制

二帝失尊山陵無所何哉樹立失權託付非才四維不張而苟且之政多也夫天下者大器也器大者不可以小道理勢重者不可以爭競擾古先哲王知其然也是以扞其大患而不有其功禦其大災而不尸其利是以感而應之悅而歸之如晨風之鬱北林魚龍之趨淵澤也然後設禮文以理之斷刑罰以威之故衆悅其教而安其俗君子勤禮小人盡力廉恥篤於家閭邪僻銷於胸懷又况可奮臂大呼聚之以干紀作亂之事乎加之

朝寡醇德之士鄉乏不二之老風俗淫僻趣向失所學者以莊老為宗而黜六經談者以虛薄為辨而賤名檢當官者以望空為高而笑勤恪劉頌屢言治道傳咸每糾邪正皆謂之俗吏若夫文王日昃不暇食仲山甫夙夜匪懈者蓋共嗤黜以為灰塵而相詬病矣由是毀譽亂於善惡之實情慝奔於貨欲之塗選者為人擇官官者為身擇利其婦女莊櫛織紝皆取成於婢僕未嘗知女功絲枲之業中饋酒食之事也故皆不恥淫佚之過

不拘妬忌之惡有殺戮妾媵有黷亂上下父兄不之罪  
天下莫之非人况責之聞四教於古修貞順於今以輔  
佐君子者哉禮法刑政於此大壞如室之斯構而去其  
鑿契如水斯積而决其隄防如火斯畜而離其薪燎也  
國將亡本必先顛其此之謂乎

天皇氏

顏峻始學篇曰天地立有天皇十三頭號曰天靈治萬  
八千歲

洞冥記曰一姓十三人也

徐整三五歷紀云歲起攝提元氣肇有神靈一人有十

三頭號天皇

春秋緯曰天皇地皇人皇兄弟九人分九州長天下也  
遁甲開山圖曰天皇被跡在桂州崑崙山下

地皇氏

顏峻始學篇曰地皇十一頭治八千歲

帝系譜曰地皇治一萬八千歲以火德王

遁甲開山圖曰地皇興於熊耳龍門山

人皇氏

顏峻始學篇曰人皇九頭兄弟各三百歲依山川土地之勢裁度為九州各居其一方因是而區別

榮氏曰人皇兄弟九人生於刑馬山身九色

有巢氏

顏峻始學篇曰上古皆穴處有聖人教之巢居號大巢氏皇甫謐以為有巢在女媧之後

遁甲開山圖曰石樓山在琅琊昔有巢氏治此山南

燧人氏

尚書大傳曰燧人為燧皇以火紀官

禮含文嘉曰燧人始鑽木取火炮生為熟令人無腹疾  
遂天之意故為燧人

太昊庖犧氏

易曰古者庖犧氏之王天下也仰則觀象於天俯則觀  
法於地觀鳥獸之文與地之宜近取諸身遠取諸物於

是始作八卦以通神明之德以類萬物之情結繩而網罟以畋以漁蓋取諸離

禮含文嘉曰伏羲德洽上下天應以鳥獸文章地應以龜書伏羲乃則象作易

帝王世紀曰太昊帝庖犧氏風姓也蛇身人首有聖德都陳作瑟三十六絃

贊魏陳王曹植庖羲贊曰木德風姓八卦創焉龍瑞名官法地象天庖厨祭祀罟網魚畋瑟以像時神德通玄

帝女媧氏

淮南子曰往古之時四極廢九州裂天不兼覆地不周載猛獸食精民精善也鷙鳥攫老弱於是女媧鍊五色石以補蒼天斷鼈足以立四方極鼈大龜也蒼天神四極正淫水涸冀州平狡蟲死精民生背方州抱圓天

帝王世紀曰帝女媧氏亦風姓也作笙簧亦蛇身人首一曰女希是為女皇其末諸侯共工氏任知刑以強伯而不王

贊魏陳王曹植女媧贊曰古之國君造簧作笙禮物未就軒轅纂成或云二皇人首蛇形神化七十何德之靈

炎帝神農氏

易曰神農氏作斲木為耜揉木為耒耒耨之利以教天下益取諸益日中為市致天下之貨交易而退各得其所益取諸噬嗑

周書曰神農之時天雨粟神農耕而種之作陶冶斤斧為耜鉏耨以墾草莽然後五穀興以助菓蓏實

春秋命歷序曰有神人名石年蒼色大眉戴玉理

玉理猶玉

英神農也

呂氏春秋曰神農教曰士有當年不耕者則天下或受其饑矣女有當年不績者則天下或受其寒矣故夫親耕妻親績

賈誼書曰神農以為走禽難以久養民乃求可食之物嘗百草察實鹹苦之味教民食穀

帝王世紀曰炎帝神農氏姜姓也人身牛首長於姜水

有聖德都陳作五絃之琴始教天下種穀故號神農氏  
諸侯夙沙氏叛不用命箕文諫而殺之炎帝退而修德  
夙沙之民自攻其君而歸炎帝

贊魏陳王曹植神農贊曰少典之胤火德承木造為耒  
耜導民播穀正為雅琴以暢風俗

黃帝軒轅氏

易曰黃帝垂衣裳而天下治蓋取乾坤也

左傳曰郯子曰黃帝以雲紀官故為雲師而雲名

河圖挺佐輔曰黃帝修德立義天下大治乃召天老而問焉余夢見兩龍挺白圖以授余於河之都天老曰河出龍圖雄出龜書紀帝錄列聖人之姓號興謀治太平然後鳳皇處之令鳳皇以下三百六十日矣天其受帝圖乎黃帝乃祓齋七日至於翠媯之川大鱸魚折溜而至乃與天老迎之五色畢具魚汎白圖蘭葉朱文以授

黃帝名曰錄圖

龍魚河圖曰黃帝時有蚩尤兄弟八十一人並獸身人

語銅頭鐵額食沙石子造立兵杖刀戟大弩威振天下  
誅殺無道不仁慈萬民欲令黃帝行天下事黃帝仁義  
不能禁蚩尤黃帝仰天而歎天遣玄女下授黃帝兵信  
神符制伏蚩尤帝因使之主兵以制八方蚩尤沒後天  
下復擾亂黃帝遂畫蚩尤形像以威天下天下咸謂蚩  
尤不死八方萬邦皆為弭伏

春秋內事曰軒轅氏以土德王天下始有堂廡高棟深  
宇以避風雨

列子曰黃帝喜天下之戴己也養正命娛耳目乃喟然歎曰養一己治萬物其患如此於是放萬機舍官寢退而閒居大庭之館齋心服形三月不親政事晝寢而夢遊於華胥華胥氏國不知距齊國幾千里齊中蓋非舟

車足力之所及神遊而已其國入水不溺入火不熱乘空如履實寢虛若處牀黃帝既寤怡然自得又二十八年天下大治幾若華胥國矣

淮南子曰黃帝治天下而力牧太山稽輔之使強不得

掩弱衆不得暴寡人民保命而不夭歲時熟而不凶百  
官正而無私輔弼公而不阿道不拾遺市不預賈城郭  
不閉邑無盜賊人相讓以財狗彘吐菽粟於道路而無  
忿爭之心於是日月精明星辰不失其行風雨時節五  
穀登熟虎豹不妄噬鷺鳥不妄搏鳳皇翔於庭麒麟遊  
於郊青龍進駕飛黃伏阜飛黃出西方其狀如獵背上  
有角乘之壽一千歲阜歷也  
諸北儕耳之國莫不獻其貢職皆北極  
之夷國

史記封禪書曰黃帝得僊上天羣臣葬其衣冠

帝王世紀曰黃帝有熊氏少典之子姬姓也生壽丘長于姬水龍顏有聖德受國於有熊居軒轅之丘故因以為號治五氣設五量及神農氏衰黃帝修德撫民諸侯咸去神農而歸之黃帝於是乃擾馴猛獸與神農氏戰于阪泉之野三戰而克之又徵諸侯使力牧神皇直討蚩尤氏擒之于涿鹿之野使應龍殺之于凶黎之丘凡五十二戰而天下大服有妃生二十五子黃帝在位百年而崩年百一十歲矣或傳以為仙或言壽三百歲葬

于上郡陽周之橋山

抱朴子曰黃帝生而能言役使百靈可謂天授自然體之者猶復不敢端坐而得道故陟王屋而受丹經到鼎湖而飛流珠登崆峒而問廣成之具淡而事大魄適東岱而奉中黃入金谷而諮詢心論導養而質玄素二女精推步則訪山稽力牧講占候則詢風后著體諒則受雷岐審攻戰則納五音之策窮神姦則記澤之辭相地理則書青烏之說救傷殘則綴金冶之術故能畢記秘

要窮盡道真遂升龍以高濟與天地乎罔極

頌晉牽秀黃帝頌曰邈矣黃軒應天載靈通幽遠覽觀  
象設形誕敷厥訓彝倫攸經德從風流化與雲征皇猷  
允塞地平天成爰登方岳封禪勒成紛然鳳舉龍騰太  
清達茲九土陟彼高冥民斯攸慕涕泗沾纓遐而不墜  
式頌德聲

贊魏陳王曹植黃帝贊曰少典之孫神明聖哲土德承  
火赤帝是滅服牛乘馬衣裳是制氏雲名官功冠五列

又黃帝三鼎贊曰鼎質文精古之神器黃帝是鑄以像  
太一能輕能重知凶識吉世衰則隱世和則出

晉曹毗黃帝贊曰軒轅應玄期幼能聰百神體鍊五靈  
妙氣含雲露津摻石曾城岫鑄鼎荆山濱豁焉天扉闢  
飄然跨騰鱗儀轡灑長風褰裳躡紫宸

周庾信黃帝見廣成畫贊曰治身紫府問政青丘龍湖  
鼎沒丹竈珠流疎雲即雨落木先秋至道須極長生可  
求

少昊金天氏

左傳曰鄭子曰我高祖少昊摯之立也鳳鳥適至故紀於鳥為鳥師而鳥名焉

帝王世紀曰少昊帝名摯字青陽姬姓也降居江水有聖德邑于窮桑以登帝位都曲阜故或謂之窮桑即圖讖所謂白帝朱宣者也故稱少昊號金天氏在位百年而崩

贊陳思王曹植少昊贊曰祖自軒轅青陽之裔金德承

土儀鳳帝世官鳥號名殊職別系農正扈氏各有品制

顓頊高陽氏

史記曰帝顓頊高陽者靜深有謀疏通知事北至幽陵南至交趾西濟流沙東至蟠木動靜之物大小之神日月所照莫不砥屬

帝王世紀曰帝顓頊高陽氏黃帝之孫昌意之子姬姓也母曰景僕蜀山氏女為昌意正妃謂之女樞金天氏之末女樞生顓頊於若水首戴干戈有聖德父昌意雖

黃帝之嫡以德劣降居若水為諸侯及顓頊生十年而  
佐少昊二十而登帝位平九黎之亂以水事紀官南正  
重司天以屬神北正黎司地以屬民於是民神不雜萬  
物有序始都窮桑徙商丘命飛龍効八風之音作樂六  
英以祭上帝世有才子八人號八凱顓頊在位七十八  
年年九十一歲歲在鶉火而崩葬東郡頓丘廣陽里

贊魏曹植帝顓頊贊曰昌意之子祖自軒轅始誅九黎  
水德統天以國為號風化神宣威暢八極靡不祗虔

帝嚳高辛氏

史記曰帝嚳高辛氏者黃帝之曾孫也父曰蟜極蟜極父曰玄囂玄囂父曰黃帝自玄囂與蟜極不得在位帝嚳生而神靈自言其名日月所照風雨所至莫不從助帝王世紀曰帝嚳高辛氏姬姓也有聖德年十五而佐顓頊四十登位都毫以人事紀官故以勾芒為木正祝融為火正蓐收為金正玄冥為水正后土為土正是五行之官分職而治諸侯於是化被天下遂作樂六莖以

康帝位世有材子八人號曰八元亦納四妃卜其子皆有天下元妃有台氏女曰姜嫄生后稷次有娀氏女曰簡翟生禹次陳豐氏女曰慶都生放勛次娵訾氏女曰常儀生摯帝譽在位七十年年百五歲而崩葬東郡頓丘廣陽里

贊魏陳思王曹植帝譽贊曰祖自軒轅玄囂之裔生言其名木德帝世撫寧天地神聖靈察教弭四海明並日月

帝堯陶唐氏

尚書堯典曰若稽古帝堯曰放勛欽明文思安安允恭克讓光被四表格于上下克明俊德以親九族九族既睦平章百姓百姓昭明協和萬邦黎民於變時雍

論語曰大哉堯之為君也巍巍乎唯天為大唯堯則之蕩蕩乎民無能名焉巍巍乎其有成功也煥乎其有文章

春秋元命苞曰堯眉八采是謂通明厯象日月璇璣玉

衡

尚書中候曰帝堯即政榮光出河休氣四塞龍馬衡甲赤文綠色甲似龜背五色有列星之分斗政之度帝王錄紀興亡之數

大戴禮曰宰我曰請問帝堯孔子曰其仁如天其智如神就之如日望之如雲富而不驕貴而不豫

淮南子曰人之所以樂為天子者以其窮耳目之欲而適躬體之便也今高臺曾榭人之所麗也而堯采椽不

斲斤題不枅言櫟柱相斤  
距不着枅櫨珍恠奇味人之所羨也而堯  
糲粱之飯藜藿之羹文錦狐白人之所好也而堯布衣  
掩形鹿裘禦寒養生之具厚不加以增之以大任重之  
憂故舉天下而傳之舜若釋負然

帝王世紀曰帝堯陶唐氏祁姓也母慶都孕十四月而  
生堯於丹陵名曰放勛鳥庭河勝或從母姓伊氏年十  
五而佐帝摯受封於唐為諸侯身長十尺嘗夢天而上  
之故二十而登帝位都平陽置敢諫之鼓命羲和四子

羲仲羲叔和仲和叔分掌四時方獄之職故名曰四獄也諸侯有苗氏處南蠻而不服堯征而克之于丹水之浦乃以尹壽許由為師夔放山川谿谷之音作樂大章天下大和百姓無事有五十老人擊壤於道觀者歎曰大哉帝之德也老人曰吾日出而作日入而息鑿井而飲耕田而食帝何力於我哉於是景星曜於天甘露降於地朱草生於郊鳳皇止於庭嘉禾孽於畝醴泉湧於山焦僥民來貢沒羽厨中自生肉脯其薄如翼形搖鼓

自生風使食物寒而不鳧名曰翼脯又有草夾階而生  
隨月生死王者以是占日月之數惟盛德之君應和而  
生故堯有之名曰蓂莢始封稷契咎繇褒進伯禹納舜  
于大麓後年二月又率羣臣刻璧為書東沈洛水言天  
命當傳舜之意今中候運衡之篇是也凡堯即位九  
八年年百一十八歲乃殂百姓如喪考妣三載四海遏  
密八音葬于濟陰之成陽西北是為穀林堯取富宜氏  
女曰女皇生丹朱又有庶子九人皆不肖故以天下命

舜曰咨爾舜天之厯數在爾躬允執其中四海困窮天  
祿永終及堯三年喪畢舜踐天子位

符子曰堯曰余坐華殿之上森然而松生於棟余立櫺  
扉之內霏焉而雲生於牖雖面雙闕無異乎崔巍之冠  
蓬萊雖背墉榔無異乎迴巒之紫崑崙余安知其所以  
安

贊魏陳王曹植帝堯盡贊曰火德統位父則高辛克平  
共工萬國同塵調適陰陽其惠如春巍巍成功配天則

神

帝舜有虞氏

尚書舜典曰慎徽五典五典克從納于百揆百揆時叙賓于四門四門穆穆納于大麓烈風雷雨弗迷帝曰咨爾舜詢事考言乃言底可績三載汝陟帝位

禮記曰子曰舜其大智也與好察邇言隱惡而揚善執其兩端用其中於民其斯以為舜乎又曰昔舜作五絃之琴以歌南風

論語曰無為而治者其舜也與夫何為哉恭已正南面而已矣

孝經援神契曰舜龍顏重瞳大口手握襄

重瞳象電多精光也大口

象斗屋口也握襄手中有衰字喻從勞苦起受衰飾致大位也

雒書靈准聽曰有人方面日衡重華

日衡衡有骨表如日者也

握石

推懷神珠

推讀鍾鑪鉏平輕重者也握石鍾謂知璇璣之道也懷神珠喻有聖智也

舜受終鳳皇儀黃龍感朱草生蓂莢孽西王母授益地

圖

西王母得益地之圖來獻

孟子曰雞初鳴而起孳孳為善者舜之徒也雞初鳴而起孳孳為利者蹠之徒也

蹠盜

又曰堯之於舜使其子

九男事之妻以二女馬百官牛羊倉廩備以養舜於畎畝之中而後舉加諸上位又曰舜聞一善言見一善行若決江湖沛然莫之能禦也

尸子曰舜一徙成邑再徙成都三徙成國堯聞其賢徵之草茅之中與之語禮樂而不逆與之語政至簡而行與之語道廣大而不窮於是妻之以娥姁之以娥九子

事之而託天下焉

韓子曰歷山農者侵畔舜往耕暮年而耕者讓畔河濱漁者爭埶舜往漁暮年而漁者讓長東夷之陶者苦窳舜往陶暮年而器以牢

呂氏春秋曰舜有子九人不予以其子而授禹至公也

帝王世紀曰帝有虞氏姚姓也目重瞳故名重華字都君有聖德始遷於負夏販於頓丘債於傅虛家本冀州每徙則百姓歸之堯於是見舜於貳官設饗禮迭為賓

主南面而問政堯乃試以五典遂舉八凱使佐后土以  
揆百事舉八元使布五教于四方舜於是大功二十  
故夢眉長與髮等堯乃賜舜以昭華之玉老而命舜代  
己攝政舜東巡狩登南山觀河渚受圖書寢賜羣臣尊  
任伯禹稷契臯繇伯益地有苗氏負固不服禹請征之  
舜曰我德不厚而行武非道也吾前教由未也乃修教  
三年執干戚而舞之有苗請服立誹謗之木申命九官  
十二牧三載一考績三考黜陟幽明禹為司空功被天

下棄為后稷播時百穀契為司徒敬敷五教臯繇為士  
典刑惟明僕為共工莫不致力益為朕虞庶物繁植伯  
夷為秩宗三禮不闕夔為樂正神人以和龍為納言出  
內惟允於是俊乂在官羣后德讓百僚師師以五采章  
施于五色為服以六律五聲八音協治治用之和蒸民  
乃粒萬邦作乂庶績咸熙乃作大韶之樂簫韶九成鳳  
皇來儀擊石拊石百獸率舞故孔子稱韶盡美矣又盡  
善也景星曜於房羣瑞畢致地出乘黃舜於是德被天

下薦於天使禹攝政有苗氏叛南征崩于鳴條殯以瓦  
棺葬于蒼梧九疑山之陽是為陵零謂之紀市在今營  
道下有羣象為之耕

贊魏陳王曹植帝舜贊曰顓頊氏族重瞳神聖克協禎  
瞽應唐蒞政除凶舉俊以齊七政應歷受禪顯天之命  
晉夏侯湛虞舜贊曰有虞愔愔揖讓鼓琴垂拱臨民詠  
彼南音世澄道玄天下混心思王度如玉如金

晉庾闡虞舜像贊并序曰夫至道玄妙非器象所載靈

化潛融非軌迹所傳故道資冲樸則謂之三皇德被羣  
生則號稱舜禹是以先王因其會通制為准極功格於  
天則配于上帝法施於民則載在祀典然後名教彰於  
至治王道煥乎無窮故茲堂之構也有自來矣然樹寢  
所以栖神而寢非神之所期立像所以表德而像非德  
之所存若乃廢其軌景洞其玄真雖冥照之鑒獨朗天  
下惡乎注其耳目哉遂乃顯圖靈像廓其廟壇俾天光  
焜於宇宙南風散乎五絃豈謂神道之妙可寄之於有

涯哉蓋亦暢悠悠者之心也其辭曰玄像焜耀萬物含  
靈飛龍在天陽德文明神道雖寂務由機生擁琴高詠  
寄和五聲玄風既暢妙盡無名民鑒其朗孰測窈冥  
周庾信舜千戚盡贊曰平風變律擊石來儀先齊七政  
更服三危朱干獨舞玉戚空麾南風一曲恭已無為

碑後魏溫子昇舜廟碑曰懷山不已龍門未闢大道御  
世天下為公感夢長人明敷仄陋釐降二女結友九男  
執耜歷山耕夫所以讓畔施罟雷澤漁父於是讓川亦

既登庸以之納錄九官咸事百揆時叙有大功於當世  
集歷數而在躬受文祖之命致昭華之玉班五瑞於羣  
后禋六宗於上玄舞干戚而遠夷賓棄金璧而幽靈應  
青雲浮洛榮光塞河符瑞必臻休祥咸萃以君人之大  
德為帝王之稱首陟方之駕遂往蒼梧之空不歸爰自  
先民實存舊廟既緝薦房遂鎮瑤席龍駕帝服蓋依稀  
於慕舜交鼓亘瑟實髡鬚於聞韶其辭曰虹氣降靈姚  
墟誕聖樹陰未徙帝圖已定乃賓四門以齊七政天眷

功高民歸德盛治既蕩蕩化亦巍巍南風在詠西環  
歸疑山永逝湘水長違靈宮肅肅神館微微

文宋顏延之為湘州祭虞帝文曰惟哲化神繼天作聖  
藏器漁陶致身愛敬是以二妃嬪德九子觀命在麓不  
迷御衡以正唐歷既終虞道乃光咨堯授禹素俎采堂  
百齡厭世萬里陟方敬詢故老欽咨聖君職奉西湘虞  
屬南雲神之聽之匪酒伊葷

帝禹夏后氏

尚書大禹謨曰受命于神宗率百官若帝之初

從舜初授帝政

事奉行之

論語曰子曰禹吾無間然矣非飲食而致孝乎鬼神惡衣服而致美乎黻冕卑宮室而盡力乎溝洫

禮舍文嘉曰禹卑宮室垂意於溝洫百穀用成神龍至靈龜服玉女敬養天賜

春秋元命苞曰禹之時民大樂其駢三聖相繼故夏者大也

左傳曰禹會諸侯於塗山執玉帛者萬國

尚書中候曰伯禹曰臣觀河伯面長人首魚身出水曰

吾河精也授臣河圖

尚書璇璣鈴曰禹開龍門導積石

玄圭出刻曰延喜玉受德天賜佩

禹功既成天出玄圭以賜之占者以德佩

禹有治水功故天佩以玄圭

呂氏春秋曰禹南濟乎江黃龍負舟

事具祥瑞部

淮南子曰禹沐淫雨櫛疾風決江疏河鑿龍門闢伊闢

乘四載隨山刊木平治水土定七百國又曰禹為水以  
身解於陽肝之河

解禱也陽  
肝河在秦

吳越春秋曰禹案黃帝中經見聖人所記曰在九疑山  
東南天柱號曰宛委承以文玉覆以盤石其書金簡青  
玉為字編以白銀皆瑑其文禹乃東巡登衡山求之赤  
繡文衣男子自稱玄夷蒼水使者來候禹令齋三日更  
求之禹乃三日齋登宛委山取得書得通水之理遂周  
行天下使益疏記之名山海經也

鬻子曰禹飯一饋而七起曰吾不恐四海之士留於道路也恐其留吾門也是以四海之士皆至禹當朝廷門可以羅雀

帝王世紀曰伯禹夏后氏姒姓也生於石塲虎鼻大口兩耳參漏首戴鈞鈴脣有玉斗足文履已故名文命字高密身長九尺二寸長於西羌西羌夷人也其父既放降在匹庶有聖德夢日洗於河西四獄師舉之舜進之堯堯命以為司空繼鯀治水乃勞身涉勤不重徑尺之

璧而愛日之寸陰手足胼胝故世傳禹病偏枯足不相過至今巫稱禹步是也又納禮賢人一沐三握髮一食三起堯美其績乃賜姓姒氏封為夏伯故謂之伯禹天下宗之謂之大禹年百歲崩于會稽因葬會稽山陰縣之南山今山上有禹冢并祠下有羣鳥芸田又曰禹葬衣食三領桐棺三寸葛以繻之下不及泉上不通鳬既葬收餘壤為壠若叅耕之畝


符子曰禹讓天下於奇子奇子曰君言佐舜勞矣鑿山

川通河漢首無髮股無毛故舜也以勞報予我生而逸  
不能為君之勞矣

贊魏陳王曹植夏禹贊曰吁嗟夫子拯世濟民克卑宮  
室致孝鬼神蔬食薄服紩冕乃新厥德不回其誠可親  
亹亹其德溫溫其仁尼稱無間何德之純又禹治水  
贊曰嗟夫夏禹實勞水功西鑿龍門疏河道江梁岐既  
闢九州以同天賜玄圭奄有萬邦又禹渡河贊曰禹濟  
于河黃龍負舟舟人並懼禹歎仰天予受大運勤功恤

民死亡命也龍乃弭身

周庾信禹渡江贊曰三江初鑿九谷新成風飛鷗涌水起  
龍驚樂天知命無待憂生危舟遂靜亂楫還平



藝文類聚卷十一

欽定四庫全書

子部

藝文類聚卷十三

詳校官中書臣李彤

員外郎臣牛穎文覆勘

總校官知縣臣楊懋珩

校對官中書臣李荃

謄錄監生臣馮士新

欽定四庫全書

藝文類聚卷十二

唐歐陽詢撰

帝王部

殷成湯

周文王

周武王

周成王

漢高帝

漢文帝

漢景帝

漢武帝

漢昭帝

漢宣帝

漢光武帝

帝

殷成湯

春秋元命苞曰湯臂四肘是謂神肘

尚書璇璣鈴曰湯受金符帝錄白狼銜鉤入殷朝

尚書中候曰天乙在亳諸鄰國襁負歸德東觀乎維降

三分璧黃魚雙躍出濟于壇化為黑玉赤勒曰玄精天  
乙受神福伐桀克

尚書湯誓曰伊尹相湯伐桀升自陑遂與桀戰于鳴條  
之野

春秋元命苞曰湯之時其民大樂其赦之於患害故樂  
名大濩濩者赦也又曰扶都感白氣而生湯

周書曰湯放桀而歸於亳三千諸侯大會湯取天子之  
璽置之於天子之座左復而再拜從諸侯之位湯曰此

天子之位有道者可以處之矣夫天下非一家之有也  
有道者之有也故天下者唯有道者理之唯有道者宜  
處之湯以此三讓三千諸侯莫敢即位然後湯即天子  
之位

孟子曰湯居毫與葛為鄰葛伯不祀湯使人問何為不  
祀曰無以供犧牲湯遺之牛羊葛伯得而食之又不祀  
湯又問之曰無以供粢盛湯使毫民為之耕老弱饋食  
葛伯率衆要其酒肉黍稷者遮而奪之不以饗授者則

殺之有一童子以黍肉餉殺而奪焉湯乃興師伐葛伯天下聞之皆曰非富天下也為匹夫匹婦報讐也

呂氏春秋曰成湯之時有穀生於庭眷生至旦而大合拱史請卜其故湯退卜者曰吾聞祥者福之先也見祥而為不善則福不至妖者禍之先也見妖而為善則禍不至於是早朝晏退問疾弔喪務鎮撫百姓三日而穀亡

尚書大傳曰夏人飲酒醉者持不醉者不醉者持醉者

相和而歌曰盍歸于亳盍歸于亳上毫亦大矣故伊尹退而閒居深聽樂聲思其故也是時伊尹化桀更曰覺兮較兮吾大

命格兮

覺兮謂先知者較兮謂直道者也格至也吾語桀也

去不善而就善何樂

兮伊尹入告于桀曰大命之亡有日矣桀啞笑曰天之有日猶吾之有民也日亡吾亦亡矣是以伊尹遂去夏

適湯

說苑曰湯欲伐桀伊尹請且乏貢職以觀夏動桀怒起九夷之師伊尹曰未可彼尚能起九夷之師是罪在我

也湯乃謝請服入貢職明年又乏貢職桀起九夷之師九夷之師不起伊尹曰可矣湯乃興師伐桀殘之遷於南巢

帝王世紀曰成湯一名帝乙豐下銳上倨身而揚聲長九尺有聖德諸侯有不義者湯從而征之誅其君弔其民天下咸悅故東征則西夷怨南征則北狄怨曰僕為而後我凡二十七征而德施於諸侯出見羅者方祝曰從天下者從地出者四方來者皆入吾羅湯曰嘻盡之

矣非桀其孰能為此哉乃命解其三面而置其一面更  
教之祝曰欲左者左欲右者右欲高者高欲下者下吾  
取其犯命者漢南諸侯聞之咸曰湯之德至矣澤及禽  
獸况於人乎一時歸者三十六國及夏桀無道舉諫者  
湯使人哭之桀囚湯使於夏臺而後釋之諸侯由是咸  
叛桀附湯同日貢職者五百國三年而天下咸服湯自  
伐桀後大旱七年殷史卜曰當以人禱湯曰吾所為請  
雨者民也若必以人禱吾請自當遂齋戒剪髮斷爪以

已為牲禱於桑林之社言未已而大雨方數千里湯踐  
天子位十三年年百歲而崩

贊魏陳王曹植殷湯贊曰殷湯伐夏諸侯振仰放桀鳴  
條南面以王桑林之禱炎災克償伊尹佐治可謂賢相  
又湯禱桑林贊曰惟殷之世炎旱七年湯禱桑林祈福  
于天剪髮離爪自以為牲皇靈感應時雨以零

周庾信湯解網贊曰連珠雨起合玉雙沉穀為祥樹桑  
成樂林三方落網一面驅禽德以行政仁乎用心

周文王

春秋元命苞曰文王四乳是謂含良益法酒旗帜布恩舒

明

酒者乳也能乳天  
下布恩之謂也

周書曰文王在鎬召太子發曰我身老矣吾語汝我所保與我所守傳之子孫吾厚德而廣惠不為驕侈不為泰靡童牛不服童馬不馳土不失其宜萬物不失其性天下不失時以成萬材萬材已成牧以為人天下利之而勿德是謂大仁

墨子曰赤鳥銜珪降周之岐社日命周文王伐殷  
韓子曰昔文王請入雒西地赤壤之國方千里以解炮  
烙之刑天下皆說

仲尼曰大哉文王輕千乘之國而請解炮烙之刑

韓詩外傳曰昔周文王寢疾五日而地動東西南北不出四郊有司請曰臣聞地之動為人主也今者君王寢疾五日而地動四面不出國郊羣臣皆恐曰請移之文王曰奈何其移之也對曰興事動衆以增國城其可移

之文王曰夫天之見妖以伐有罪我必有罪故天以罰  
我也今又專興事動衆以增國城是重吾罪也不可請  
改行重善移之其可以免乎於是遂謹其禮秩皮革以  
交諸侯飾其辭令幣帛以出禮俊士頌其爵列等級田  
疇以賞羣臣行無幾何而疾止

琴操曰受命者謂文王受天命而王文王以紂時為岐  
侯躬修道德執行仁義百姓附親是時紂為無道剗胎  
斲涉廢壞仁人天統易運諸侯瓦解皆歸文王其後有

鳳凰銜書於文王之郊文王曰殷帝無道虐亂天下皇命已移不得復久乃作鳳凰之歌其章曰翼翼翔翔彼鸞皇兮銜書來遊以命昌兮瞻天案圖殷將亡兮蒼蒼昊天始有萌兮神運精合謀於房兮又曰文王備修道德百姓親附文王有二子周公武王皆聖是時崇侯虎與文王列為諸侯德不及文王常嫉妬之乃譖文王於紂曰西伯昌聖人也長子發中子旦皆聖人也三聖合謀君其慮之乃囚文王於羑里將欲殺之於是文王四臣

散宜生等周流海內經歷豐土得美女二人水中大貝  
白馬朱鷺以獻於紂陳於中庭紂立出西伯文王在羑  
里時演易八卦以六十四作鬱厄之辭困於石據於蒺  
藜乃申憤以作歌曰殷道溷溷浸濁煩兮朱紫相合不  
別分兮迷亂聲色信讒言兮炎炎之虐使我愆兮幽閉  
牢寢由其言兮遘我四人憂勤勤兮

論衡曰文王飲酒千鍾孔子百觚言聖人能以德持酒  
也如一坐千鍾百觚此酒徒非聖人也

帝王世紀曰文王昌龍顏虎肩身長十尺胸有四乳敬老慈幼晏朝不食以延四方之士是以太顛閔天散宜生南宮适之屬咸至是為四臣文王雖在諸侯之位襲父為西伯紂既囚文王文王之長子曰伯邑考質于殷為紂御紂烹以為羹賜文王曰聖人當不食其子羹文王得而食之紂曰誰謂西伯聖者食其子羹尚不知也

贊魏陳王曹植文王贊曰於赫聖德實惟文王三分有二猶服事商化加虞芮傍暨西方王業克昭武嗣遂光

又文王赤雀贊曰西伯積德天命攸顧赤雀銜書爰集  
昌戶瑞為天使和氣所致嗟爾後王昌期而至

周庾信文王見呂尚贊曰言歸養老垂釣西川岸止磐  
石谿唯小船風雨未感意氣怡然有此相望于今幾年

周武王

尚書中侯曰太子發以紂存三仁雖即位不稱王

樂稽耀嘉曰武王承命興師誅紂于商萬國咸喜軍渡孟  
津前歌後舞克殷之後民乃大安家給人足酌酒鬱搖

鬱搖  
喜貌

史記曰武王修文王業東觀兵孟津為文王木主載以車中軍自稱太子發言奉文王以伐不敢自專遂興師渡于河時諸侯不期而會孟津者八百諸侯皆曰紂可伐武王曰未可也乃還師居二年聞紂昏亂滋甚殺比干囚箕子太師疵少師疆微子抱其祭器而葬周於是武王乃渡孟津伐紂紂師皆倒干戈以戰紂軍潰叛紂死

帝王世紀曰武王見賜人王自左擁而右扇之紂政彌亂殷太史向摯載其圖書而歸周王以告于諸侯四年起師而東至商郊牧野乃作木檜王轔係解五人御於前莫肯為王係轔皆曰臣所以事君王非為係轔也王乃釋旄鉞而係之與紂戰紂師敗績禽費仲惡來紂赴于京自燔于宣室而死二嬖妾與妲己亦自殺乃以太白髦麾諸侯入殷商都百姓咸待于郊王使告曰上天降休商人皆拜王亦答拜以兵入造紂及妲己尸王親

射之三發然後下軍以劒擊之周公為司徒使以黃鉞  
斬紂頭懸于太白之旗召公為司空又使以玄鉞斬妲  
己頸懸之小白旗置旌於商容之廬命召公釋箕子之  
囚賜貝千朋命原公釋百姓之囚歸璇臺之珠玉命南  
宮适散鹿臺之財發巨橋之粟以賑貧民命南宮伯達  
史逸遷九鼎于洛邑命閔夫封比干之墓命宗祝饗祀  
于軍微子膠鬲皆委質為臣殷人咸喜曰王之於人也  
死猶封其墓况其生者乎王之於賢仁也亡者猶表其

廬况其存者乎王之於財也聚者猶散之况其復藉者乎王之於色也在者猶歸其父母况復徵之乎

贊魏陳王曹植周武王贊曰桓桓武王繼世滅殷咸在尚父旦作商臣功加四海救世濟民天下宗周萬國是

賓

周成王

春秋元命苞曰文王造之而未遂武王遂之而未成周公旦抱少主而成之故曰成王

賈誼書曰周成王問鬻子曰寡人聞聖人在上位使民富且壽若夫富則可為也若夫壽則在天乎鬻子對曰夫聖王在上位天下無軍兵之事故諸侯不私相攻而民不私相鬭也則民得盡一生矣聖王在上則君積於德化而民積於用力故婦人為其所衣丈夫為其所食則民無凍餓已得二生矣聖人在上則君積於仁吏積於愛民積於順則刑罰廢而無天遏之誅則民得三生矣聖王在上則使人有時而用之有節則民無厲疾民

得四生矣

史記曰成王少周公攝行政管叔蔡叔羣弟疑周公與武庚作亂周公奉成王命誅武庚殺管叔放蔡叔以微子啟代殷後國於宋周公行政七年成王長周公反政成王北面就羣臣之位成王在豐使召公復營洛邑如武王之意卒營築居九鼎焉曰此天下之中四方入貢道里均

帝王世紀曰成王元年周公為冢宰攝政王生少未能

治事故號曰孺子八年春正月朔王始躬政事以周公為太師封伯禽于魯父子並命周公拜於前魯公拜於後王以周公有勲勞於天下故加魯以四等之上兼二十四附庸地方七百里既營都洛邑復居酆鎬淮夷徐戎及奄叛王乃大蒐於岐陽東伐淮夷

贊魏陳王曹植周成王贊曰成王繼武賢聖保傳年雖幼稚岐嶽有素初疑周公終焉克寤旦奭佐治遂至刑錯又周公贊曰成王即位年尚幼稚周公居攝四海慕

利罰叛柔服祥應仍至誦長反政達天忠義

周庾信成王刻桐葉封虞叔贊曰虞叔百里居河之汾  
帝刻桐葉天書掌文禮以成德樂以歌勲天子無戲唐  
其有君

漢高帝

河圖提劉曰帝季日角戴勝斗胃龜背龍股長七尺八  
寸明聖寬仁好士主軫

春秋孔演圖曰其人日角龍顏姓卯金舍仁義

史記曰高祖諱邦字季沛豐邑中陽里人為人隆準而龍顏美鬚髯左股有七十二黑子寬仁愛人意豁如也為泗上亭長常從王媪武負貰酒飲醉卧武負王媪見其上常有龍怪之高祖每留飲酒饌數倍呂公者好相人見高祖狀貌因敬重之呂公曰臣少好相人相人多矣無如季相願季自愛臣有息女願為箕箒妾女即呂后也生孝惠帝魯元公主有一老父過請飲老父相呂后曰夫人天下貴人也令相兩子見孝惠帝曰夫人所

以貴者乃此男曾元公主亦皆貴老父已去高祖從旁  
舍來呂后具言高祖乃追及老父老父曰向見者夫人  
兒子皆似君相君相貴不可言及高祖貴遂不知老父  
去處高祖以亭長為縣送徒於驪山到豐西澤中亭止  
飲夜皆解縱所送徒高祖夜經澤中前有大白蛇當徑  
高祖拔劍斬之秦始皇帝常曰東南有天子氣於是東  
遊高祖隱於芒碭山澤間呂后與人俱求常得之高祖  
怪問呂后呂后曰季所在山居常有雲氣故徃常得季

高祖興諸侯兵共擊項羽項羽敗而走使騎將灌嬰追殺羽東城正月諸侯尊漢王為皇帝又曰范增說項羽曰沛公居東貪於財貨好美姬今入關財物無所取婦女無所幸此其志不在小吾令人望氣皆為龍虎成五采此天子氣也

漢書曰漢承堯運德祚已盛斷蛇著符旗幟尚赤協于火德自然之應得天統矣

論衡曰項羽與高祖俱起威力輕重未有所定高祖誅

羽難於斬鐵也武王伐紂易於推木也然則漢力勝周多矣湯武伐桀紂一敵也高祖誅秦殺項羽兼勝二家力倍湯武五代之起皆有因緣力易為也高祖從亭長提三尺劍取天下光武由白水奮威武帝海內無尺土所因一位所乘直奉天命推動自然此則起高於川汙為深於丘山也

荀悅漢紀論曰高祖開建大業統畢元功度量規矩不可尚矣天下初定庶事草創故韶夏之音天下未聞焉

帝王世紀曰禮稱至道以王義道以霸觀高祖之取天下也遭秦暴亂不階尺土之資不摧將相之柄發迹泗亭奮其智謀銜勒英雄鞭驅天下或以德致或以義成事以權斷順逆不常霸王之道雜焉是以居帝王之位而無一定之制三代之美固難及矣

述後漢班固高祖紀述曰皇矣漢祖纂堯之緒實天生德聰明神武秦人不綱網漏于楚爰茲發迹斷蛇奮旅神毋告符朱旗乃舉粵蹈秦郊嬰來稽首革命創制三

章是紀應天順民五星同畧項氏叛援黜我巴漢西土  
宅心戰士憤怨乘釁而運席卷三秦割據河山保此懷  
民股肱蕭曹社稷是經爪牙信布腹心良平恭行天罰  
赫赫明明

贊魏陳王曹植漢高皇帝贊曰屯雲斬蛇靈母告祥朱  
旗既抗九野披攘禽嬰克羽掃滅英雄承機帝世功著  
武湯

晉傅元漢高祖盡贊曰赫赫漢祖受命龍興五星協象

神母告徵討秦滅項如日之升超從側陋光據萬乘

周庾信漢高祖置酒沛宮盡贊曰遊子思舊來歸沛宮  
還迎故老更召歌童雖欣入沛方念移豐酒酣自舞先

歌大風

碑後漢班固高祖泗水亭碑曰皇皇炎漢兆自沛豐乾  
降著符精感赤龍承魁流裔襲唐末風寸木尺土無埃  
斯亭建號宣基維以沛公揚威斬蛇金精摧傷涉闊凌  
灞受爵漢中勒兵陳東剝禽三秦陳張畫策蕭勃翼終

出爵褒賢列土封功炎火之德彌光以明源清流潔本  
盛末宏序將八十贊述股肱休勲顯祚永永無疆於皇  
舊亭留嗣是承天之福祐萬年是興

論後漢孔融周武王漢高祖論曰武王從后稷以來至  
其身相承積五十世俱有魚鳥之瑞至高祖一身修德  
瑞有四呂公望形而薦女呂后見雲知其處白蛇分神  
武哭西入闕五星聚又武王伐紂斬而刺之高祖入秦  
赦子嬰而遺之是寬裕又不如高祖也

魏高貴鄉公少康漢高祖論曰上問荀顗等曰有夏既衰后相殄滅少康收輯夏衆復禹之績高祖拔起壘畝芟夷秦項考其功德誰宜為先顗等曰造之與因難易不同少康功德雖美猶為中興與漢世祖同流可也至如高祖臣等以為優上曰少康生於滅亡之後辟為諸侯之隸能布其德而兆其謀卒滅過戈復禹之績祀夏配天不失舊物非至德宏仁豈濟斯勲漢祖因土崩之勢收一時之權為人子則數危其親為人君則因賢

佐為人父則不能衛子身歿之後社稷幾傾若與少康易地而處或未能復大禹之績也推此言之宜高夏康而下漢祖也

漢文帝

史記曰孝文皇帝初立為代王都中都高后崩呂產等欲為亂以危劉氏大臣共誅之使人迎代王代王問左右郎中令張武張武等議願大王稱疾以無往觀其變中尉宋昌進曰羣臣議皆非也今高帝子獨淮南王與

大王大王又長賢聖仁孝聞於天下故大臣因天下之心而欲迎立大王大王勿疑也迺命宋昌參乘張武等六人乘傳詣長安馳入代邸代王西鄉讓者再遂即天子位又曰孝文帝即位二十三年宮室苑囿狗馬服御無所增益有不便輒弛以利民常欲作露臺召匠計之直百金帝曰百金中民十家之產吾奉先帝宮室常恐羞之何以臺為所幸慎夫人衣不曳地幃帳不得文繡以示敦朴先與匈奴和親匈奴背約入盜然令邊備守

不得發兵深入惡煩苦百姓羣臣如袁盎等稱說雖切常假借用之羣臣如張武受賂遺金錢覺上常發御府金錢賜之以愧其心專務以德化民是以海內殷富興於禮義又曰孔子言必世而後仁善人為邦百年亦可以勝殘去殺矣誠哉是言漢興至孝文四十有餘載德至盛也

漢書曰孝文皇帝諱恒高帝中子也母曰薄太后又曰文帝斷獄四百幾致刑措又曰武帝問東方朔曰吾欲

化民豈有道乎朔對曰願近述孝文皇帝之時當世耆老皆聞見之貴為天子富有四海身衣弋绨足履革舄以革帶劒莞蒲為席集上書囊為殿帷

述後漢班固文帝述曰太宗穆穆允恭玄默化民以躬率下以德農不供貢罪不收帑宮不新館陵不崇墓我德如風民應如草國富刑清登我漢道

贊魏陳王曹植漢文帝贊曰孝文即位愛物檢身驕吳撫越匈奴和親納諫赦罪以德讓民殆至刑錯萬國化

淳

漢景帝

史記曰漢興孝文施德天下懷安至孝景不復憂異姓而晁錯刻削諸侯遂使七國俱起合從而西鄉以諸侯大盛而錯為之不以漸也及主父偃言之而諸侯以弱卒以安漢安危之機豈不以謀哉

漢書曰孝景帝諱啟文帝太子也母曰竇皇后又曰孔子稱斯氏三代之所以直道而行也信哉周秦之弊網

密文峻而姦宄不勝漢興掃除煩苛與民休息至孝文  
加之以恭儉孝景遵業五六十載之間至於移風易俗  
黎民醇厚周云成康漢言文景美矣

述後漢班固景帝述曰孝景莅政諸侯方命尅伐七國  
王室以定非急非荒務在農桑著于甲令民用寧康  
贊魏陳王曹植漢景帝贊曰景帝明德繼文之則肅清  
王室克滅七國省役薄賦百姓殷昌風移俗易齊美成  
康

漢武帝

漢書曰孝武皇帝諱徹景帝中子也元封元年行自雲  
陽北歷上郡西河五原出長城登單于臺臨北河勒兵  
十八萬騎旌旗十餘里威震匈奴還登封泰山又自潯  
陽浮江親射蛟江中獲之舳艤千里又登之罘東萊有  
之罘山祠浮大海山稱萬歲又曰漢承百王之弊高祖撥亂反  
正文景務在養民至于稽古禮文之事猶多闕焉孝武  
初立卓然罷黜百家表章六經遂疇咨海內舉其俊民

與之立功興大學修郊祀改正朔定歷數協音律作詩樂建封禪祀百神號令文章煥焉可述後嗣得遵洪業而有三代之風如武帝之雄材大略不改文景之恭儉以濟斯民雖詩書所稱何有加焉

荀悅漢紀曰武皇帝恢萬世業內修文學外曜武威廷天下之士濟濟盈朝興事創制無所不施先王之風粲然存矣然猶好其文未盡其實發其始不克其終奢侈無限窮兵極武百姓空竭萬民罷弊當此之時天下騷

然海內無聊而孝文之業衰矣

劉歆七略曰孝武皇帝勅丞相公孫弘廣開獻書之路百年之間書積如丘山故外則有太常太史博士之藏內則有延閣廣內秘室之府

桓子新論曰漢武帝材質高妙有崇先廣統之規故即位而開發大志考合古今模範前聖故事建正朔定制度招選俊傑奮揚威怒武義四加所征者服興起六藝廣進儒術自開闢以來唯漢家最為盛焉故顯為世宗

可謂卓爾絕世之主矣然上多過差既欲斥境廣土又乃貪利爭物之無益者聞西夷大宛國有名馬即大發軍兵攻取歷年士衆多死但得數十疋耳又歌兒衛子夫因幸愛重乃陰求陳皇后過惡而廢退之即立子夫更其男為太子後聽邪臣之譖衛后以憂死太子出走滅亡不知其處信其巫蠱多徵會邪僻求不急之方大起宮室內竭府庫外罷天下百姓之死亡不可勝數此可謂通而蔽者也

典論曰孝武承四世之遺業遇中國之殷阜府庫餘金  
錢倉廩畜腐粟因此有意乎滅匈奴而得清邊境矣故  
即位之初從王恢之畫設馬邑之謀自元光以迄征和  
四五十載之間征匈奴四十餘舉盛餘踰廣漢絕梓嶺  
封狼居禪姑幕梁北河觀兵瀚海刈單于之旗勦閼氏  
之首探符離之窟掃五王之庭納休屠昆耶之附獲祭  
天金人之寶斬名王以千數馘酋虜以萬計既窮追其  
散亡又推破其積聚虜不暇於救死扶傷疲困於孕重

墮殞元封初躬執武節告以天子自將懼以兩越之誅  
彼時號為威震匈奴矣

述後漢班固武帝述曰世宗曄曄思宏祖業疇咨熙載  
髦俊並作厥作伊何百靈是攘恢我疆宇外博四荒武  
功既抗亦廸斯文憲章六學統一聖真封禪郊祀登秩  
百神協律改正饗茲永年

贊魏陳王曹植漢武帝贊曰世宗光光文武是攘威震  
百靈恢拓土疆簡定律歷辨修舊章封天禪土功越百

王

周庾信漢武帝聚書贊曰獻書路廣藏書府開秦儒出谷  
漢簡吹灰芝泥印上玉匣封來坐觀風俗不出蘭臺

漢昭帝

漢書曰昭皇帝諱弗陵武帝子也母曰趙婕妤本以有奇  
異得幸及生帝亦奇異又曰昔周成以孺子繼統而有  
管蔡四國流言之變孝昭幼年即位亦有燕蓋上官逆  
謀之亂成王不疑周公孝昭委任霍光各因其時以成

名大矣哉承孝武奢侈餘弊師旅之後海內虛耗戶口  
減半知時務之要輕徭薄賦與民休息至始元元鳳之  
間匈奴和親百姓充實舉賢良文學問民所疾苦議鹽  
鐵而罷榷酤尊號曰昭不亦宜乎

述後漢班固昭帝述曰孝昭幼冲冢宰推忠燕益譁張  
寶獻實聰罪人斯得邦家和同

論魏文帝周成漢昭論曰或方周成王於漢昭帝僉高  
成而下昭余以為周成王體上聖之休氣稟賢妣之貽

誨周召為保傅呂尚為太師口能言則行人稱辭足能  
履則相者慕儀目厭威容之美耳飽仁義之聲所謂沉  
漬亥流而沐浴清風者矣猶有咎悔聆二叔之謗使周  
公東遷皇天赫怒顯明厥咎猶啟諸金縢稽諸國史然  
後乃悟不亮周公之聖德而信金縢之教言豈不暗哉  
夫孝昭父非武王母非邑姜養惟益主相則桀光體不  
承聖化不胎育保無仁孝之質佐無隆平之治所謂生  
於深宮之中長於婦人之手然而德與性成行與體并

年在二七早智夙達發燕書之詐亮霍光之誠豈將有  
啟金縢信國史而後乃悟哉使夫昭成均年而立易世  
而化貿臣而治換樂而歌則漢不獨少周不獨多也

魏丁儀周成漢昭論曰成王昭帝俱以襁褓之幼託於  
冢宰流言讒興此其艱險相似者也夫以發金縢然後  
垂泣與計日力便覺詐書明之遲速既有差矣且叔父  
兄子非相嫌之處異姓君臣非相信之地霍光罹人謗  
而不周公賴天變而得入推此數者齊本而論末計

重而况輕漢昭之優周成甚明者也成王秀而獲實其  
美在終昭帝苗而未秀其得在始必不得已而論二主  
余與夫始者

漢宣帝

漢書曰孝宣皇帝諱詢字次卿武帝曾孫戾太子孫也  
太子納史良娣生皇孫皇孫納王夫人生皇帝號曰皇  
曾孫生數月遭巫蠱事太子良娣皇孫王夫人皆遇害  
曾孫坐繫郡邸獄邴吉為廷尉監治巫蠱憐曾孫之無

幸使女徒乳養私給衣食至後望氣者言長安獄有天  
子氣上遣使皆殺之內者令郭穰夜至郡邸獄吉拒閉  
不得入曾孫賴吉得全因遭赦高才好學然亦喜遊俠  
鬪雞走馬具知閭里奸邪吏治得失時會朝請舍長安  
尚冠里身足下有毛卧居數有光耀昭帝崩無嗣霍光  
徵昌邑王賀賀淫亂廢光奏遣宗正德至尚冠里舍洗  
沐賜御府衣太僕以輦獵車奉迎曾孫就齊宗正府封為  
陽武侯羣臣上璽綬即皇帝位又曰宣帝始立謁見高

廟大將軍光參乘上內嚴憚之若芒刺在背後張安世代光參乘天子從容肆意甚安又曰孝宣之治信賞必罰綜覈名實政事文學法理之士咸精其能至于技巧工匠器械自元成間鮮能及之者亦足以知吏稱其職民安其業也遭值匈奴乖亂推亡固存信威北夷單于慕義稽首稱蕃功光宗祖業垂後嗣可謂中興侔德殷宗周宣矣

荀悅漢紀曰孝宣任法審刑綜覈名實聽斷精明事業

修理下無隱情是以功光前世號為中宗然不甚用儒術是以德化不能純備

述後漢班固宣帝述曰中宗明明寅用刑名時舉博納聽斷惟精柔遠能邇輝耀威靈龍荒漠朔莫不來庭丕顯祖烈尚於有成

後漢光武帝

東觀漢記曰世祖光武皇帝高祖九世孫出自長沙定王定王生舂陵節侯舂陵本在零陵郡節侯孫孝侯以

土地下濕元帝時求封南陽蔡陽白水鄉因故國名曰  
春陵上隆準日角大口美鬚眉身長七尺三寸仁智明  
達多權略樂施愛人在家重慎畏事勤於稼穡兄伯升  
好俠笑上事田作比之高祖兄仲上歸舊廬望見廬南  
有火光以為人持火呼之光遂赫然屬天有頃不見上  
異之初伯升之起也諸家子弟皆亡逃自匿曰伯升殺  
我及聞上至絳衣大冠乃驚以為獨伯升如此謹厚者  
亦為之又曰王莽遣大司徒王尋大司空王邑將兵來

征莽欲盛威武王齊則虎豹犀象奇偉猛獸以長人臣無霸為中壘校尉秦漢以來師出未嘗有也時漢兵八千人二公兵以五六十萬到遂環昆陽城作營且圍之數百重有流星墜尋營營中正晝有雲氣如壞山直下營而不及地尺而散吏士皆厭伏上選精兵三千人與戰大破之殺司徒王尋赴水溺死者以萬數滍水為之不流更始以上為大司馬遣之河北安集百姓破邯鄲誅王郎入官收文書尋得吏民謗毀上言可擊者數

千章上會諸將燒之曰令反側子自安也更始遣使者立上為蕭王又擊破銅馬受降適畢賊亦兩心上勅降賊各歸勒兵待上輕騎入按行賊營賊曰蕭王推赤心置人腹中安得不投死由是皆自安又曰諸將請上尊號初王莽時上與伯叔及姊聳鄧晨攘人蔡少公坐語少公道讖言劉秀當為天子或曰是國師劉子駿也上戲曰何由知非僕也坐者皆大笑時傅闐赤伏符不見文章軍中所上未信到鄗上所與長安同舍諸生強華

自長安奉赤符詣鄗與上會羣臣復伏固乃命有司設壇鄗之千秋亭六月即皇帝位

袁宏漢紀曰南頓令欽生光武皇帝諱秀字文叔

帝王世紀曰春秋興夏少康之起有田一成有衆一旅若漢之策命世祖不階成旅之資平暴反正遂建中興夏少康同美矣

續漢書曰昔羿寒浞篡夏數十年少康生為牧人能修德復夏厥勲大矣然尚有虞思及靡有鬲内外之助至

於光武承王莽之篡起自足庶一民尺土靡有憑焉發  
迹於昆陽以數千屠百萬非膽智之至孰能堪之討賊  
平亂克復漢業號稱中興雖初興者無以加之矣中國  
既定柔遠以德愛慎人命下及至賤武功既抗文德聿  
修勲績宏矣

薛瑩漢紀曰王莽之際天下雲亂英雄並發其跨州據  
郡僭制者多矣人皆有冀於非望然考其聰明仁勇自  
無光武儔也加以寬博容納計慮如神是以任光實融

望風景附馬援一見覩顏識竒故能以十數年間掃除  
羣凶清復海內豈非天人之所輔贊哉古者師不內御  
而光武命將皆授以方略使奉圖而進其有違失無不  
折傷意豈文史之過乎不然雖聖人其猶病諸

袁山松後漢書曰前漢自成衰已下天地縱橫巨猾竊命  
劉氏舊澤猶存而瞻烏之望殆絕世祖以眇眇之肩起  
白水之濱身屈無妄之力位舉羣賢並列于時懷璽者  
十餘建旗者數百高才者居南面疾足者為王公茫茫

九州瓜分齕切潛潛蒼生塵消鼎沸我扇之以仁風驅  
之以大威雪霜被而茨棘枯橫網振而逆鱗掃羣材畢  
湊人鬼與能數年之間廓清四海雖曰中興與夫始創  
業者庸有異乎誠哉馬生之言固已寥廓大度同符高  
祖又等太宗之仁兼孝宣之明一人之體其殆于周故  
能享有神器據乎萬乘之上矣

碑後漢蔡邕光武濟陽宮碑曰王室中微哀平短祚姦  
臣王莽偷有神器十有八年罪盈惡熟天人致誅帝乃

龍見白水淵躍昆湧破前隊之衆殄二公之師收兵略  
地經營河朔於是羣公諸將據河洛之文協符瑞之徵  
僉曰歷數在帝蹟祚允宜乃以建武元年六月即位于  
鄗縣之陽五成之陌祀漢配天罔失舊物享國三十有  
三年方內乂安蠻夷率服巡狩太山禪梁父皇代之遐  
迹帝者之上儀罔不畢舉道德餘慶延于無窮先民有  
言曰樂樂其所自生而禮不忘其本是以虞稱媯汭姬  
美周原皇天乃眷神宮實始于此厥路藐哉所謂神麗

顯融越不可尚小臣河尹瑋來在濟陽願見神宮追惟  
桑梓褒述之義用敢作頌其辭曰赫赫炎天爰曜其暉  
篤生聖皇貳漢之微稽度虔則誕育靈姿黃孽作惠纂  
掘天機帝赫斯怒爰整其師應期潛見扶陽而飛禍亂  
克定羣凶殄夷匡復帝載萬國以綏廵于四岳展義省  
方登封降禪升于中皇爰茲初基天命孔彰子子孫孫  
保之無疆

論魏陳王曹植漢二祖優劣論曰客有問余曰夫漢二

帝高祖光武俱為受命撥亂之君此時事之難易論其人之優劣孰者為先余應之曰昔漢之初興高祖因暴秦而起遂誅強楚先有天下功齊湯武業流後嗣誠帝王之元勲人君之盛事也然而名不繼德行不純道身沒之後崩亡之際果令凶婦肆酖酷之心嬖妾被人豕之刑亡趙幽囚禍殃骨肉諸呂專權社稷幾移凡此諸事豈非高祖寡計淺慮以致然彼之雄才大略倣儻之節信當世至豪健壯傑士也又其梟將畫臣皆古今之

鮮有歷世之希覩彼能任其才而用之聽其言而察之  
故兼天下有帝位流巨勲而遺元功也世祖體乾靈之  
休德稟貞和之純精通黃中之妙理韜亞聖之懿才其  
為德也聰達而多識仁智而明恕重慎而周密樂施而  
愛人值陽九無妄之世遭炎光厄會之運殷爾雷發赫  
然神舉用武略以攘暴興義兵以掃殘神光前驅威風  
先逝軍未出於南京莽已斃於西都夫其盪滌凶穢勦  
除醜類若順迅風而縱烈火曠白日而掃朝雲也爾乃

廟勝而後動衆計定而後行師故攻無不陷之壘戰無奔北之卒是以羣下欣欣歸心聖德宣仁以和衆邁德以來遠故竇融聞聲而影附馬援一見而歎息股肱有濟濟之美元首有穆穆之容敦睦九族有唐虞之稱高尚純朴有羲皇之素謙虛納下有吐握之勞留心庶事有日昃之勤乃規宏迹而造皇極創帝道而立德基是以計功而業殊比隆則事異旌德則靡愆言行則無穢量力則勢微論輔則力劣卒能握乾圖之休徵應五百

之顯期立不刊之遐迹建不朽之元功金石播其休烈  
詩書載其勲懿故曰光武其優也

漢明帝

東觀漢記曰孝明皇帝世祖中子也母光烈皇后初讓  
尊位為貴人故帝年十二以皇子立為東海公三歲進  
爵為王幼而聰明獻智容貌壯麗世祖異焉數問以政  
議應對敏達謨慮甚深溫恭好學敬愛師傅所以承事  
兄弟親密九族內外周洽世祖愈珍上德以為宜承先

序詔廢郭皇后立陰貴人以為皇后上以東海王立為  
皇太子治尚書備師法兼通四經略舉大義博觀羣書  
以助術學又曰建武四年皇子陽生豐下銳上顏赤色  
有似堯上以赤色名之曰陽年十三通春秋上循其頸  
曰吳季子

袁山松後漢書曰皇帝諱陽一名莊字子麗

華嶠後漢書曰世祖既以吏事自嬰明帝尤任文法總  
攬威柄權不借下值天下初定四民樂業戶口滋殖中

興以來追蹤宣帝以鍾離意之廉淳諫爭懇懃常以寬和為首以此推之難得而言也

薛瑩漢紀曰明帝自在儲宮而聰允之德著矣及臨萬機以身率禮恭奉遺業一以貫之雖夏啟周成繼體持統無以加焉是以海內乂安四夷賓服斷獄希少有治平之風號曰顯宗不亦宜乎

范曄後漢書曰帝善刑理法令分明日晏坐朝幽枉必達外內無倖曲之私在上無矜大之色斷獄得情號居

前世十二故後之言事者莫不先建武永平之政然而鍾離意宋均之徒常以察患為言夫豈宏仁之度未優乎

贊晉傳玄漢明帝贊曰肅矣孝明仗法任刑勤綜萬機察下以情未宏道治用致太平專信俗儒非禮之經誅漢傳毅明帝誅曰惟此永平其德不回恢廓鴻績遐方是懷明明肅肅四國順威赫赫盛漢功德巍巍躬履聖德以臨萬國仁風宏惠雲布雨集武伏蚩尤文騰孔

墨下制九州上係皇極豐美中世垂華億載冠堯佩舜  
踐履五代三雍既洽帝道繼備七經宣暢孔業淑著明  
德慎罰尊上師傳薄刑厚賞惠慈仁恕明並日月無有  
偏照譬如北辰與天同曜發號施令萬國震懼庠序設  
陳禮樂宣布璇璣所建靡不奄有貢篚納賦如歸父母  
正朔永昌冠帶儕耳四方共貫八極同軌

漢和帝

東觀漢記曰孝和皇帝章帝中子也上自岐嶷至於總

角孝順聰明寬和仁孝帝由是深珍之以為宜承天位  
年四歲立為太子初治尚書遂兼覽書傳好古樂道無  
所不照上以五經義異書傳意殊親幸東觀覽書林閱  
篇籍朝無寵族惠澤沾濡外憂庶績內勤經藝自左右  
近臣皆誦詩書德教在寬仁恕並洽是以黎元寧康萬  
國協和符瑞八十餘品帝讓而不宣故靡得而紀

帝王世紀曰孝和之嗣世正身履道以奉大業賓禮者  
艾動式舊典宮無嬪嬪鄭衛之燕囿無般樂遊畋之豫

躬履至德虛靜自損是以屢獲豐年遠近承風

范曄後漢書曰自中興以後逮于永元雖頗有施張而俱存不擾是以齊民歲增闢土世廣偏師出塞則漢北地空都護西指則通驛四萬豈其道遠三代術長前世將服叛懷來自有數也

誅後漢蘇順和帝誅曰天王徂登率土奄傷如何昊穹奪我聖皇恩德累代乃作銘章其辭曰恭惟大行配天建德陶元二化風流萬國立我蒸民宜此儀則厥初生

民三五作剛載籍之盛著於虞唐恭惟大行爰同其光  
自昔何為欽明允塞恭惟大行天覆地載無為而治冠  
斯往代往代崎嶇諸夏擅命爰茲發號民樂其政奄有  
萬國民臣咸秩大孝備矣闕宮有恤由昔姜嫄祖妣之  
室本枝百世神契惟一彌留不豫道揚末命勞謙有終  
實惟其性衣不制新犀玉遠屏履和而行威稜上古洪  
澤滂流茂化沾溥不憇少留民斯何怙歟歟成雲泣涕  
成雨昊天不弔喪我慈父

後漢崔瑗和帝誄曰玄景寢曜雲物見徵馮相考妖遂  
當帝躬三載四海遏密八音如喪考妣擗踴號吟大隧  
既啟乃徂永宮承背神器升遐皇穹長夜冥冥曷云其  
窮

藝文類聚卷十二